

Mucha chikito ta pega cu enfermedadnan venerico

Muchanan inocente ta sigui bira victima di abusadornan

Casonan ta sigui dreña cerca autoridad

ORANJESTAD(AAN)--

Na Imeldahof tin un lista di espera. Muchanan, cu no por conta cu un cas cu ta un hogar. Hopi di e muchanan chiquito ya a bira adulto na un forma cruel: nan a bira victima di violador. Imeldahof no ta e unico instancia cu conoce e casonan aki. Otro instancianan oficial, cu ta traha cu familiaran kibra y problemanan di hogar, ta mira e fila di mucha abusa crece. Autoridad ta worde confronta cu mas caso.

Muchanan inocente ta sigui bira victima di abusadornan.

Hopi biaha nos tin un imágen propio di un violador o abusador di mucha: nos ta mire como un homber cu paña sushi, kibra; hasta sin zapato, bao influencia di alcohol o di droga. En realidad, e violador no tin un cara exacto. E por ta e bisña tan cariñoso o yiu di e bisña. E por ta e bon amigo, cu tur ora

ta pasa pa duna bon consejo. E por ta un padrastro o hasta un familiar hopi cerca. Un violador o abusador di mucha, por ta un persona cu nunca ta bandona su dashi y semper ta cana na forma intachable. Pero bao di e disfraz aki ta sconde un cantidad di mal intencion, cu ta spera e momento pa e actua.

Den pasado tabata tin mas vista ariba muchanan. Mayor nan, y especialmente mamanan cu tabata dedica nan bida na nan yiu, tabata sa exactamente unda e mucha ta cualquier momento. No tabata tin cuenta di bay pasa dia sin mas cerca amigonan y no tabata tin casi asunto di keda drumi un caminda. Awor situacion a cambia y muchanan hopi biaha ta worde laga den man di un sirvienta, di un conocir, bisña o hasta so den cas pa algun rato. Oportunidad cu e mente maniaco di e abusador ta probecha di dje pa actua.

Un mama cu ta traha recientemente a experiencia con rapido un abusador di mucha ta actua. El a bay traha y su esposo a confia un persona cu tabata haci trabao pa nan cu tres di nan yiunan. El a bay haci un respondi y den e rato cu el a bay e abusador a actua contra e mucha di algo mas cu tres aña.

Esaki ta unicamente un di e tantísimo casonan cu ta tuma lugar. Autoridadnan ta actua y ta detene e malhechornan. Instancianan oficial ta dreña den accion. Tur loke nan por haci ta, percura pa e abusador haya su castigo y pa e mucha envolvi haya ayudo. Pero e mal ya a worde haci y ta difícil pa elimine for di mente di e mucha, cu ta cana cu e herida mental o moral pa resto di su bida.

Banda di esaki enfermedadnan di caya ta amenaza e pover muchanan, cu ta bira victima di

abuso sexual. Informenan a indica cu tin mucha joven cu ya ta padece di e enfermedadnan venerico pa motibo cu nan a bira victima di abuso sexual. Muchanan, cu a penas a haya oportunidad di skirbi o leza ya a pasa den experencianan grave, cu ta cambia henter nan bida.

E situacion ta dramático, manera a worde splica na DIARIO pa personanan cu a pidi mayornan pa por favor mira kico ta pasa cu nan yiunan. Mientrastanto instancianan oficial ta kibra nan cabez kico haci cu e situacion.

Pa por solucione varios persona cu DIARIO a papia cune, ta mira necesidad pa cambio den sistema actual. Pa cuminsa e cantidad di divorcio, bibamento y casamento mas di un biaha ta trece homber y muher straño den cas. Loke mamanan por mira como un gesto di cariño en realidad por ta acercamento di e mucha.

Otro caso ta cu ta duna confianza na amistadnan, sin tene

cuenta cu tras di e cara di lamchi por tin un lobo scondi. Importante den henter e asunto aki ta, cu lo tin cierto videonan pornografico, cu cada bez ta haya mas atencion y mas acogida cerca publico y cu ta basa hustamente ariba violacion di mucha, cu ta worde considera un atraccion mayor. E videonan aki ta worde mira den seno di familia, caminda bareranan ta worde kibra.

Informantenan a muestra cu nan no kier crea panico ni sensacion den publico. Pero si mayornan mester ta alerta y mester cuminsa realiza nan responsabilidad y aporta cu tur cautela necesario pa evita cu nan yiunan por bira victima di abusadornan. Mester papia cu e muchanan constantemente, duna nan confianza pa expresa nan mes y mira cu kende nan ta anda na school, den weg, den clubnan.

Alarma mester worde bai pa loke ta pasa, ya cu e situacion ta sali completamente for di man.